

中國近代文學叢書

上海古籍出版社

琴志樓詩集

四

易順鼎 著
王 飈 校點

中國近代文學叢書

上海古籍出版社

琴志樓詩集

四

易順鼎 著
王 飈 校點

琴志樓詩集卷十六

高州集

宣統辛亥年正月起

辛亥初正和少石藩使見和登鷄山原韻

一絃錦瑟又彈過，優詔生涯付醉歌。老去懷人知己少，春來謝客忌辰多。黃鷄縱速猶強飯，繡豸雖貧勝荷戈。獨感朵雲飛渡海，瑤箋傳誦費摩挲。

石甫觀察以登放鷄山詩寄示即次元韻請正

陳夔麟 少石

鷄山魚塞使旌過，來暮歡聲入詠歌。正旦星雲知歲改，衙官雷電屬君多。君贈王高雷，有「君將雷電作衙官」名句，今自據而有之矣。島夷有幸留唐碣，日御能迴奮魯戈。我亦息鞭亭下立，鬢絲斜照兩摩挲。

和藩使東園韻

駕海難將石作橋，東園相望采藍蕭。射牛不預遷傷漢，祭纓成文愈貶潮。訪艷已辜鄉號媚，鞫囚最恨盜名嬌。粵中盜匪多以嬌爲名，如煙尿嬌、陳火嬌之類。子淵金馬空持節，那及當年謚洞簫。

人日游東園得詩一章錄請琴樓五兄和政

陳夔麟

堤外珠江堤內橋，東園人日馬蕭蕭。本來嶺表稱香國，可有鄉思逐暮潮。夾道樓臺歌舞盛，園左右舞臺、妓館均先後落成。嬉春兒女綺羅嬌。是日立春。自慚老大蠻夷長，也倚朱欄聽奏簫。

和藩使與介弟筱石制府元日唱和韻

陝西東作屋西東，棣萼恩榮卜始終。慧業天親耦無著，詩才大復敵空同。吟梅官閣尊初綠，煨芋僧房火尚紅。我愧無詩題寄弟，彭城愁聽雨兼風。由甫弟在廬陵。

附錄 元日與舍弟筱石專電唱和詩以博一笑

陳夢麟

頻年宦轍各西東，爆竹聲喧歲已終。位業又從明日起，容顏可與少時同。臘梅萼寄一枝綠，棠棣花開兩地紅。聞說海南春事好，潁濱翹首羨坡公。筱，天津除夕。

棠棣詩成寄粵東，北門鎖鑰歲初終。元方難弟推予季，玉局雄才畏阿同。子由一字同叔，坡有贈阿同詩。宦海各驚絲鬢白，春盤不惜酒顏紅。卜鄰如踐香山約，願假西湖作寓公。少。

初春書感二首

半生海濶復天空，萬事何曾到念中。劫火燒成三月綠，死灰溺剩一星紅。世人欲殺偏難殺，祿命當終竟未終。春短春長都莫問，且欣雪霽與冰融。

落燈忙後落花忙，富貴花如夢一場。牡丹至正月廿一日始落盡。頗厭蛙聲喧鼓吹，國制已除。愛聽蟹眼沸官商。故山讀畫拋三徑，如水鈔書對六房。莫道蠻荒歡意少，衙齋清絕且焚香。

汪景吾自樂昌來書兼示武溪漁隱圖歌任將軍廟詩屬余和歌蓋與
伏波所征武溪同名根觸舊游羨君高躅輒和韻答寄

我昔曾歌武溪深，

由常德入黔，皆古武溪地。

越四十載沉歌音。

余年十四入黔，賦《武溪深曲》，其時

在同治庚辛間。君之武溪與我異，我歌已古君歌今。君歌任囂我馬援，囂援孰似向與禽。嗟

我黔游甫總角，已有萬古歸胸襟。豈知頭白乘一障，垂死病卧荒江潯。羨君高節不稍貶，

織畚意欲追蒙陰。我傷伏波將軍馬，君弔南海縣尉任。英雄死賺歸與鮒，男兒生殉蠹與

蟬。我方追憶陳蘭彬，荔秋太僕，吳川縣人。君忽遠問陳喬森。一山戶曹，雷州人。君來書訪其遺詩。

不須感喟秦漢跡，道咸已足愁人心。人生有何恩與怨，君亦常客西林岑。余雖爲西林制府所劾，

而不以爲怨，君常入制府幕。問君釣游何日返，久別相憶誰能禁。頗思邀君游五嶽，恨君太懶如

雲林。題詩觸我武溪夢，萬壑千巖猿夜吟。

清溪漁隱圖歌

汪兆鏞 景吾

余客樂昌，喜其山水之勝，擬繪武溪圖以寄興，苦乏畫手。適得道光間順德張墨池孝廉

如芝畫《清溪漁隱》小幀，亂山夾岸，疏柳低篷，風景酷肖。昔阮文達公有草堂在揚州覽社湖，得元人山水橫卷，畫境似之，因即名之爲「珠湖草堂圖」，跋尾有「武斷鄉曲」之語。輒襲其意，以張畫裝作冊子，繫之以詩。

昔人苦歌武溪深，俛仰蕭瑟懷遺音。千載風物頓已改，此水清澈無古今。泊宅年年向溪澣，久狎煙雨親魚禽。沿緣葦間發秀眄，潺湲石底瀕煩襟。天風海立那能料，強醉且卧荒江潯。泛湖未得效范蠡，抱甕尚願師漢陰。欲求窈窕寫此意，屢罄東絹難可任。默遲道人仙尉侶，湯貞愍詩中論粵人畫，極稱之。流傳尺幅飄蠹蟬。平林一曲差仿佛，澹墨輕染何蕭森。縑尾清溪認殘字，招隱先得我心。斯圖恍似爲吾作，靈抱遠契同苔岑。阮公珠湖有前例，武斷鄉曲情不禁。瀧中鰕魚正肥美，不減西塞桃花林。《水經·溱水》注：武水入曲江縣界，崖壁峻阻，交柯雲蔚，謂之瀧中。韓詩「南行逾六旬，始下昌樂瀧」，樊注引歐陽文忠說：縣名樂昌，而瀧名昌樂。今瀧上多桃花，產鰕魚。畫又展罷理漁具，鼓枻試作滄浪吟。

任將軍廟

前人

《水經·溱水》注：瀧水西岸有任將軍城，南海尉任囂所築。東岸有任將軍廟。按：《漢書·南粵傳》：囂召佗，告以陳勝等作亂，恐盜兵侵此，欲與兵絕道自守。佗即移檄告橫浦陽山湟溪關。《韶州府志》謂：湟溪在今樂昌，隔河二里是。鄭注與班書情事相合。余客

樂昌，訪之，故城久圯，廟址亦無知者。偶過江潯土人所謂瑤埠廟，廊下有明萬曆二十六年邑人蕭逢春立碑云：舊祀任將軍。喜獲遺跡，因賦詩以表章之。

逐鹿中原烽火驚，東南一尉此知名。被書能識龍川令，絕道曾屯獸角城。筆路山林啓炎服，大江風雨想霓旌。我來認取殘碑字，酹酒荒苔百感生。

高州新樂府二首

新軍營

車下野宿謂之軍，軍美宮室古未聞。新軍營，高州建。費幾何？十四萬。軍尚未知何日來，來尚未知何日戰。我爲高州吏，雖嘆且勿嘆。十四萬，皆民膏。半歸土木與工匠，半歸攤館與妓寮。高財歲歲輸入廣，今日廣財輸入高。

牛皮捐

貧民長物惟一牛，賊來劫牛真可憂。賊劫牛去何處賣？牛皮抽捐賣更快。牛皮捐，

辦學堂，承餉者誰紳與商。歲抽數萬猶未足，賊樂屠樂貧民哭，學堂造成幾間屋。

和少石藩使正月十三日生辰登鎮海樓韻

早春風物最翛然，宜在花前與佛前。纔繼漁洋吟浴日，去年祭南海神廟。又招獨漉感蠻煙。登斯樓也能觀海，貞孟陬兮豈問天。開拓心胸高百尺，元龍而後有龍川。

和藩使生日生子志喜韻

屐齒纔登北郭峯，啼聲已應上方鐘。多男恰祝男生九，見本詩。避客翻教客到重。周
粹印戈曹下蔣，元宵湯餅狄平儂。好將佳事傳圖畫，斟酌南宗與北宗。

又和

早有蘭徵知燕婉，老如松健未龍鍾。天心似報裘千丈，人力猶穿札七重。南海正爭呼
召父，西湖那要羨吳儂。與筱石制府有西湖之約。東山謝傅休遺憾，制府尚未得子。羯末封胡滿
大宗。

正月十三日生辰避客登鎮海樓有作

陳夔麟

樓成洪武尚巍然，拾級尋春到檻前。五十七年初度日，百千萬井晚炊煙。高臨北極疑無地，樓即北城麗譙。遠挹南溟別有天。頗似詩人陳獨漉，一樽吟嘯問山川。陳元孝《五層樓》詩有「未堪懷古問山川」句。

生日生子命名曰同詩以志喜

前人

垂老罷張初度酒，避喧來聽上方鐘。適登觀音山，聞信馳歸。偶同誕日啼聲異，頓覺充閭喜氣重。吉兆竟能徵到汝，吟癡或可勝於儂。蘭開九畹余先後生九子。今存七，香瓣濃薰祝亢宗。

和盛芑舲看桃花原韻

去年除夕觀山寺，一樹碧桃迎客開。燈落盡時花落盡，蝶飛來後燕飛來。故人蕭瑟吟天末，春夢迷離渡水隈。安得御風蓬島去，綠苔如席海如杯。

程十髮去年自武昌用閒山詩社韻賦詩書扇寄余端州不知余又移
高涼也仲春展扇始和韻報之

木棉紅處蝶飛閒，手把瑤華不可刪。人澹似鷗宜入社，詩雄如虎獨當關。武昌自古愁春望，儋耳何時卜早還。昨夢訪君行萬里，東風吹綠故鄉山。

三十九疊閒山韻寄實甫五兄端州

程頌萬 十髮

繡衣殘照海波閒，硯譜端溪且訂刪。天以歲星爲謫諫，人來越絕領雄關。公時以欽廉道調署廣肇羅道讀書好色孤情性，斫地憂時一往還。倚劍披雲樓上立，白頭詩思黯邊山。

王新會再用前韻寄余與伯嚴因再和之亦並寄伯嚴也

越歌斷竹復續竹，楚歌濯纓兼濯足。神龍見首不見尾，聖人爲腹不爲目。奈何陽九末劫間，高談驪連說栗陸。嗟我與君皆遠宦，未掛歸帆蒲一幅。翻從窮海偶合併，有似江淮混二瀆。蜉蝣朝生而暮死，鸛鵒往歌又來哭。俗吏筐篋及刀筆，俗士苞苴與竿牘。而君與

我將奚爲，未免儒林譏視肉。方今東西競稱帝，其欲耽耽視逐逐。強權況爭說天演，噍類正恐非吾屬。散原散人我所羨，天殆擣麝散其馥。獨我老病愧公等，如羊趨肆牛遭福。一官未必能歸田，萬事何如早就木。竭來高涼更堪笑，憂讒畏譏日蹀蹀。入春月餘無一雨，久旱山亦成旱麓。和詩無暇念故人，夢想百度飛來瀑。

觀察公枉和前什因及陳吏部再用原韻奉呈並寄吏部

王景沂 義門

散原精舍富水竹，此老與公均手足。海內長句並絕倫，寶氣炤耀天下目。惜哉大范先及泉，不使頡頑雄大陸。是皆健筆掃尋丈，莽莽雲煙生尺幅。雖無定律有條貫，若疏九河理四瀆。涉樂能催萬花放，言愁恍聽羣猿哭。即今此事等芻狗，蠻語夷歌應春牘。余生學古昧皮骨，粗解聆音差竹肉。陳芳圭冕屬公等，餘子爪鱗空角逐。靖廬十年未通訊，每讀新吟飛殘屬。有冶城傭寄槩本，正色蒼蒼麗而馥。便欲青溪同掉船，其奈白牛猶在福。太息通州不可作，後死何人爲鋟木。川流電謝跡已陳，感逝傷離足仍踖。時危須公廊廟器，未許行吟還嶽麓。更憑微響答噌吰，尺水遙通千丈瀑。

春日遣懷再和少石藩使感事韻

湖通西崦九十橋，寺訪南朝四百蕭。燕子畫簾三月雨，鯉魚詩舫一春潮。吟筇舊製徐

霞客，墨竹新藏馬月嬌。夢醒蠻村無賴甚，斜陽正聽賣錫簫。

石甫觀察見和人日詩嬌字韻甚奇警因感事再賦一章自謂用嬌字亦不惡

陳夔麟

難學糊塗鄭板橋，板橋云：「難得糊塗。」一官贏得髮飄蕭。天陰未雨綢繆牖，世變如風上下潮。立憲文明光赤緊，唐分郡縣爲十緊，京縣曰赤。惱春情緒付黃嬌。神靈九載中興頌，九年籌備。準備衢謠叶鳳簫。

高涼春感

嶺外人煙百粵通，高涼無日不炎風。潘仙丹竈空山裏，譙國靈旗夕照中。蛤蚧鳴時春水綠，鷓鴣啼處木棉紅。蠻村祠廟喧簫鼓，愁絕天涯一病翁。

吳川老宿李君小巖以余寄貽近刻各種賦詩四章枉謝因答詩二首

一表章吳川文獻之美一贈李君乞鑒正焉

武功文學吳川縣，吳川自道咸以來，名將則有竇武襄、陳勇壯、曾壯果、陳勇烈，文學則有林芾南、吳回溪、林

辛山、易梅溪、槐亭父子諸公。休作尋常小邑論。犬錯鄰疆原接壤，貂璫遺跡莫爭墩。吳川人欲以梅景地歸吳川，而卒不果。梅景爲高力士故里。首開風氣由天使，陳荔秋侍郎出使泰西，爲各國遣使臣之始。不負科名有狀元。林芾南殿撰講學能文，不僅大魁爲重。我忝乘輅來問俗，至今耆舊幾人存。

海雲聞道護詩龕，頭白如僧卧一庵。聘著五千周柱史，羸年七十魏門監。君年逾七十矣。壽徵定比趙甌北，老淚還傾陸劍南。君詩有「無使書生老淚枯」之句。未遣吏人致牛酒，驪珠先惠我何堪。

實甫大公祖惠寄大著數種謹賦七律四章志謝

李文泰 小巖

抗直聲名震九垓，綉衣持節鑑江隈。揚眉喜近階前地，焦尾慚非爨下材。卿月海隅獨私照，朵雲天上忽飛來。浣薇相對臨邛令，感激臨風讀幾回。大著由池滋鐸大令轉交。公致大令書，於文泰獎譽過情，逾常摯挹，可媿亦可感也。

束筍珍如拱璧貽，一斑欣已豹全窺。歐公家世瀧岡表，白傅風流樂府詩。鈴峽循聲鄰境播，鷄林重價遠人知。雷門布鼓何堪問，如此虛心是我師。光緒戊寅以活板印拙著數種，悔爲少作，書概不存。以後所輯稿本，丙申風災，意園盪爲平地，悉付波臣矣。自後脫稿皆隨手散去，門人閒有抄存者，容俟搜緝呈定。

當代人才第一流，卅年曾未識荊州。感公說士猶甘肉，惜我懸車已白頭。春雨如膏流赤地，夕陽倒

影上紅樓。公家治譜分明在，好爲蒼生借箸籌。公才大心細，議論抗直，而一歸和平。蓋本方伯公仁書之教也。

斗大城懸海上孤，年年薪桂米如珠。傷心野祭伊川禮，太息流亡鄭俠圖。況復春田憂旱魃，恐教夜火聚鳴狐。吳川自租界交涉，災亂頻仍。去歲歉收，入春尚稀雨澤。雜糧盡失，青黃不接，來日方長，杞人之憂，其何能已。使君自有匡時略，無使書生老淚枯。

池滋鏗大令由吳川量移南海賦詩送之即題其所著西行日記

少日隨槎到大秦，中年潘鬢屢班春。歷任合浦、連州。海南赤縣需良吏，君任吳川，政聲卓著。

天外紅樓憶美人。此用本事。記事定知珠在手，君又至日本、朝鮮，皆有日記。坐懷早以玉爲身。用

林琴南序意。題詩却念君鄉國，舊雨晨星在八閩。弢庵、琴南諸公。

和少石藩使文郎彌月再疊前韻

從來感召循環理，頗似銅山應洛鐘。乳比周文還過八，瞳如虞舜不妨重。鯉庭雅詠徵僚友，鷗館新詞戲你儂。他日鳳毛知濟美，勛名更勝謝超宗。

花朝後一日同兒彌月仍用前韻復成二律錄寄石甫

陳夔麟

二分春色初彌月，投贈新詩似籀鐘。對客拜嘉庭旅百，仰天同壽命申重。兒生日恭值萬壽。寧馨何物能生此，克肖他年或類儂。莫道潁川支派遠，古來江水本朝宗。

不信丈夫憐少子，宛如大呂應黃鐘。靈椿老去冀舒七，丹荔香時梓蔭重。劉表犬豚聊復爾，史公牛馬轉愁儂。海南末有懷堪詠，慚愧陳留阮嗣宗。

始聞雨聲滴瀝

曼玉跳珠響不停，黃金入土散無形。少年最怕聽春雨，豈意而今却喜聽。

沈太侔自吉林兩次來詩賦此却寄

十幅瑤箋塞上來，披函親對海雲開。一篇鼠疫尊詩史，君新作《鼠疫篇》，皆述遼瀋近事。孤劍龍吟老霸才。南國卜居蘭佩潔，西京行役黍離哀。爲君淚灑燕昭土，何日黃金始築臺。

柚斧人北洋幕來詩因和寄

投荒我已鬢霜侵，得主君方惜寸陰。七二沾邊春水曲，百重海外瘴雲深。佗城梅萼懷人夢，儉府蓮花愛士心。彩筆好爲知己用，也同劍笛作龍吟。

幕齋曉起一首恭求夫子大人鈞訓

包安保 柚斧

昨宵卧榻覺寒侵，曉起開門日半陰。樹似海潮風力大，窗如雲水霧紋深。眼青府主憐才意，頭白高堂念子心。料檢篋書慚報稱，焚香抱膝獨沉吟。

聞天琴與伯嚴貽書倩卿諸君有游覽湖山之盛賦此却寄

碧鷄陳寶倦游秦，朱雀烏衣數討春。先生在關中最久，移吳亦數年矣。管領一灣三妹水，招邀幾箇六朝人。斜簪江左方移俗，團扇吳中遍寫真。願買青溪江令宅，前身我亦此州民。